

Johor bangunkan pusat inovasi teknologi AI

ISKANDAR PUTERI: Kerajaan negeri merancang membangunkan pusat kajian dan pembangunan serta pusat inovasi teknologi robotik, dron dan kecerdasan buatan (AI).

Pengerusi Jawatankuasa Pelaburan, Pembangunan Usahawan, Koperasi dan Sumber Manusia Johor, Mohd. Izhar Ahmad berkata, pusat kajian itu akan diwujudkan di satu lokasi khusus.

Katanya, perancangan itu sejajar dengan keperluan industri yang kini dipacu teknologi tinggi untuk kekal relevan.

“Kerajaan mengambil perhatian serius terhadap potensi industri tekno-kreatif.

“Semua inisiatif ini akan mewujudkan lebih banyak peluang pekerjaan berkemahiran tinggi selain melahirkan lebih ramai usahawan tekno di kalangan rakyat tempatan,” katanya.

Beliau berkata demikian ketika menjawab soalan S.

Ramakrishnan (PH-Bekok) ketika Sidang Dewan Undangan Negeri Johor di Kota Iskandar, di sini, hari ini.

Tambah Mohd. Izhar, inisiatif itu akan turut melengkapikan pembangunan kemudahan infrastruktur dan prasarana berteknologi lain yang sedang dirancang seperti Medini 9 Blockchain, di sini dan Kulai Iskandar Data Exchange (KIDEX) di Kulai.

Sementara itu, Mohd. Izhar turut memberitahu pandemik Covid-19 menyaksikan komuniti usahawan beralih kepada penggunaan teknologi digital dalam aspek pemasaran dan perniagaan mereka.

“Ini diterjemah menerusi Laporan Suruhanjaya Komunikasi dan Multimedia Malaysia yang menunjukkan sebanyak 79,274 Perusahaan Kecil dan Sederhana memanfaatkan penggunaan platform e-dagang dalam tempoh enam bulan pertama tahun ini.